

GANU NELANG

Unisza raih 2 emas Sukum 2015

KUALA TERENGGANU – Kontinjen Universiti Sultan Zainal Abidin (Unisza) berjaya membawa pulang dua pingat emas dan dua gangsa pada Kejohanan Sukan Kakitangan Universiti Malaysia (Sukum) 2015 edisi ke-40, yang berlangsung di Universiti Teknologi Mara (UiTM), Shah Alam.

Pengarah Pusat Sukan Unisza, Riduan Mohamed Arof berkata, kejohanan itu yang berlangsung selama enam hari bermula 17 Ogos lalu, menyaksikan pasukan olahraga Unisza berjaya meraih dua pingat emas dan satu pingat gangsa.

Menurutnya, dua pingat emas itu diraih menerusi acara 800 meter dan 1,500 meter disumbangkan Mohd Kodri Abu Bakar setelah menewaskan pencabar terdekat atlet dari Universiti Malaysia Perlis (Unimap).

“Satu lagi pingat gangsa dalam acara olahraga disumbangkan kuartet 4x400 meter, hasil gandingan mantap Mohd Kodri, Mohamad Sufri Azmi, Abdul Rahim Mohd dan Muhd Wafiy Che Yusof.

“Selain olahraga, pasukan futsal turut mempamerkan aksi cemerlang apabila berjaya menyumbang koleksi pingat gangsa buat Unisza pada temasya Sukum musim ini,”



Kuartet 4x400 meter Unisza berjaya melengkapkan kutipan dua emas dan satu gangsa dalam acara olahraga pada temasya Sukum 2015 di UiTM, Shah Alam.

katanya.

Dalam pada itu, Riduan berkata, pihaknya amat berpuas hati dengan pencapaian itu memandangkan Unisza hanya mengambil bahagian dalam empat daripada 44 acara yang dipertandingkan iaitu pingpong, futsal, bola sepak dan olahraga.

Katanya, walaupun pasukan pingpong dan bola sepak gagal meraih sebarang pingat, namun dia tetap memuji kesungguhan ditunjukkan pemain sepanjang pertandingan berlangsung, dan akan berusaha

untuk memantapkan lagi pasukan pada temasya akan datang.

“Pada temasya kali ini, kita (Unisza) hanya menghantar 65 atlet untuk menyertai empat acara yang disertai, dan akan berusaha untuk mencungkil lebih ramai bakat baru dalam kalangan warga kerja universiti pada musim depan.

“Justeru, saya harap atlet sedia ada dapat terus mengekalkan kecemerlangan mereka dengan mempergiatkan lagi sesi latihan dari masa ke masa,” katanya.